

Die Kerb war uns unn koom onnern!

Monchmol denkt merr, dass frieher alles besser war. So gieht merrs jetz, weil immer wenn Kerb iss und die Kerweborsch doorum mache, denk ich droo, wies bei unserne Kerb gewese iss.

Jaa, jaa, dess war 1954 unn iss schunn 52 Johr her, awwer trotzdem!

Mir Kerweborsch doomols hadde unser Kerb gonz alloons. Unn wenn mir gekrische hawwe: Wem geheert die Kerb?, dann konnde mir uns selbst die Ontwort kreische: Uns! Uns gonz alloo unn koom onnern! Unn nit de Vize-Vize-Vize und nit de Exe-Exe-Exe odder sunnst irchendjemand, naa, die Kerb war uns!

Unn mir hawwese genosse, unser Kerb, nit nor somsdaachs unn sunndaachs, naa, mir warn aach in de Woch jeden Daach von korz nooch drei, also fuffzeh Uhr, bis in die Nacht unnerweechs unn jeden Owend innere onnern Wertschaft. Weil uns sinn debei nit die Vize-Vize-Vize und nit die Exe-Exe-Exe gewaldisch uff de Sack gonge weil die moone mussde, wo die Kerweborsch sinn doo misse mir aach hie.

Ich will emol e Bild von uns zeiche, dess iss midde in de Woch gemacht, so um de zwonnsichsde Oktower erum. Doo sinn merr in de Hauptstrooß vorm Honnes senior soim Heisje unn mache mett Pauke unn Trompete enn gonz scheene Krach. Unn so hawwe merr in de Kerwewoch jeden Owend oogefonge.

Awwer warum konnde mir doomols jeden Owend feiern?

Weil merr nit wie heit drei Daach mett de Vize-Vize-Vize unn de Exe-Exe-Exe erumkreische mussde. Wenn dess gewese wär, dann hädde merr nämlich aach wie die Kerweborsch von heit uns in de Woch erhole unn unser Stimm widder noochwachse losse misse unn erst om Freidaach widder weider mache kenne.

Ihr merkts, ich reech mich uff. Unn reech mich noch mehr uff, wenn in de Zeidung steht, dess was heit gemacht werdd mett dene Vize-Vize-Vize und dene Exe-Exe-Exe, dess wer „traditionell“.

Naa, isses nit. Mir doomols hawwes gemacht wie die Kerweborsch vor uns unn aach noch e paar Johrgäng hinner uns: Die Kerb war uns alloo! Awwer irchendwonn hott merr mett dene Bosse mett de Vize-Vize-Vize unn de Exe-Exe-Exe oogefonge unn jetz werdd weidergemacht unn ess werdd immer doller vor allem mettem Gekrisch, aach noch nachts uff de Strooße, unn kooner waaß, wie merr dess mett dene Vize-Vize-Vize unn dene Exe-Exe-Exe widder eweckkriehe soll.

Ich moon, dess misst widder onnerst werrn. Dass die Kerb widder de Kerweborsch alloo geheert unn ich denk, doo missde die jeweilige Kerweborsch aach droo intressiert soi. Unn wennse dann rufe: Wem geheert die Kerb? Unn sich die Ontwort gewwe kenne: Uns, uns gonz alloo, dann sinn merr widder in de Tradition. Weil die Kerweborsch von vorsjohr unn die von vor-vorsjohr die hadde ihr Kerb, basta! Unn die Vize kriehnse on de Noochkerb, aach basta!

Eiern Honnes